

Na osnovu člana 30. stav 14. i člana 51. stav 3. Zakona o zaštiti prirode ("Službene novine Federacije BiH" broj 33/03), federalna ministrica okoliša i turizma donosi

PRAVILNIK O SADRŽAJU I NAČINU VOĐENJA REGISTRA ZAŠTIĆENIH PODRUČJA

I. Osnovne odredbe

Član 1.

Ovim pravilnikom uređuju se sadržaj i metode vođenja registara zaštićenih područja (u daljem tekstu: registar)

Član 2.

Registar zaštićenih područja je javni popis zaštićenih područja u Federaciji Bosne i Hercegovine.

Posebno se vode registri od strane Federalnog ministarstva okoliša i turizma (u daljnjem tekstu : Federalno ministarstvo), a posebno od kantonalnih ministarstava nadležnih za poslove okoliša (u daljnjem tekstu : kantonalno ministarstvo).

Zaštićena područja, proglašena federalnim zakonom do dana stupanja na snagu ovog pravilnika, bit će unesena u federalni registar zaštićenih područja (u daljem tekstu: Federalni registar).

Zaštićena područja, proglašena kantonalnim zakonom bit će unesena u kantonalni registar zaštićenih područja (u daljem tekstu: kantonalni registar).

Zaštićena područja, iz kantonalnih registara, bit će upisana i u Federalni registar.

Federalni registar i kantonalni registri su dio informativnog sistema za zaštitu prirode i vršenje monitoringa (u daljem tekstu: Informativni sistem)

II. Sadržaj registra

Član 3.

Federalni registar, u ovisnosti od kategorije zaštićenog područja, sastoji se od pet dijelova i to:

- 1) Zaštićena prirodna područja
- 2) Nacionalni parkovi
- 3) Spomenici prirode
- 4) Zaštićeni pejzaži
- 5) Međunarodno zaštićena područja

Kantonalni registar, u ovisnosti od kategorije zaštićenog područja, sastoji se od dva dijela i to:

- 1) Spomenici prirode
- 2) Zaštićeni pejzaži

Član 4.

Kantonalna ministarstva, pri formiranju vlastitog registra, dužna su sprovesti stručnu reviziju konzervacijskog statusa postojećeg zaštićenog područja na svojoj teritoriji, te izvesti usklađivanje sa kategorizacijom Međunarodne unije za zaštitu prirode (IUCN).

Član 5.

Svako zaštićeno područje u registru se vodi kao posebna jedinica koja se sastoji od baze podataka i dokumentacione osnove.

Član 6.

Baza podataka se sastoji od:

1) Identifikacija zaštićenog područja koja obuhvata:

- identifikacioni broj zaštićenog područja (u daljem tekstu: IBZP)
- naziv zaštićenog područja

2) Kategorija zaštićenog područja

3) Lokacija i granice zaštićenog područja i njegovih zona koja obuhvata:

- tekstualni opis lokacije područja i
- veličinu područja (u ha)
- mapu područja u Geografskom informacionom sistemu

4) Nivo zaštite:

- federalno proglašeno zaštićeno područje

- kantonalno proglašeno zaštićeno područje
- među-entitetsko zaštićeno područje

5) Zakon o proglašenju zaštićenog područja sa podacima o:

- nazivu zakona
- nazivu i broju službenog glasila
- datumu objavljivanja
- datumu stupanja na snagu.

6) Kratak opis namjene i sadržaja zaštite

7) Upravljačka ustanova zaštićenog područja

8) Napomene, komentari i dr.

9) Lista svih unošenja u registar sa podacima o:

- datumu unošenja
- tipu unošenja
- namjeni unošenja (registracija, izmjene zakona i dr.)

Član 7.

Dokumenataciona osnova se sastoji iz slijedećih dokumenata:

- 1) prijedlog za proglašavanje zaštićenog područja
- 2) zakon o proglašavanju zaštićenog područja (sa izmjenama)
- 3) poseban plan upravljanja zaštićenim područjem
- 4) dokumenti koji se odnose na prava i obaveze upravljačke ustanove zaštićenog područja
- 5) ostala važna dokumentacija, koja se odnosi na proglašavanje zaštićenog područja ili na njegovu zaštitu.

Ovi dokumenti su složeni u dokumenatacionu osnovu prema hronološkom redu.

Član 8.

Svako zaštićeno područje ima jedinstveni IBZP.

IBZP mora biti u skladu sa načinom davanja brojeva iz Internacionalne baze podataka o zaštićenim područjima.

III. Način vođenja Registra

Član 9.

Federalni registar se vodi u federalnom ministarstvu.

Kantonalni registar se vodi u nadležnom kantonalnom ministarstvu.

Član 10.

Registri se vode uz pomoć centralne računarske podrške i elektronske izmjene podataka i dokumenata. Centralna računarska podrška će biti definirana i omogućena kroz Informativni sistem.

Organi koji dostavljaju podatke i dokumente u Registar, dužni su koristiti uspostavljene elektronske medije.

Član 11.

Ministarstvo ne može samostalno, bez dogovora sa nadležnim kantonalnim ministarstvom mijenjati IBZP niti bilo koje podatke ili dokumente iz kantonalne jedinice, koja je uključena u Federalni registar.

Član 12.

Svako ima pravo, u za to određeno vrijeme i pod nadzorom službenika Ministarstva obaviti uvid u Registar, te iz podataka dobiti kopije jedinica ili dijelova jedinica . Uvid u Registar Ministarstvo može ograničiti u skladu sa Zakonom o slobodi pristupa informacijama u Federaciji Bosne i Hercegovine («Službene novine Federacije BiH», broj 32/01).

Niko nema pravo reprodukcije dijelova ili cijelog Registra ili korištenje imena Registra bez posebnog odobrenja organa, odgovornog za vođenje Registra. Uz svako korištenje podataka iz Registra, obavezno je navođenje izvora i datog IBZP-a.

IV. Prelazne i završne odredbe

Član 13.

Federalni Registar će biti uspostavljeni u roku od 3 mjeseca nakon uspostavljanja Informativnog sistema .

U prelaznom periodu do uspostavljanja Informativnog sistema kantoni su dužni dostavljati odgovarajuće podatke Federalnom ministarstvu, a prema specifikacijama dogovorenim između federalnog i kantonalnih ministarstva.

Zaštićena područja proglašena do dana stupanja na snagu ovog pravilnika, bit će unesena u Registar u roku od tri godine od dana uspostavljanja Registra.

Član 14.

Ovaj pravilnik stupa na snagu osmog dana od dana objavljivanja u «Službenim novinama Federacije BiH».

Broj:

FEDERALNA MINISTRICA

Sarajevo, 01.11.2006.

Katica Čerkez